



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

Tir Yimiyim


tiryimiyim@aolima

tir yimiyim

TAPAK 7

Jacob Zuma ita 15 tepuokdak ayutsü obendang agütsü

Tir Kovind-i Ambedkar Memorial atema nüngshilong azüngtsü



VOL. XVIII NO. 256 (ADOK 256) DIMAPUR

RASEMNÜ (WEDNESDAY)

AAMI (JUNE) 30, 2021

₹ 5.00

CM Rio-i CJI aser Union Minister den ajuruteput

Dimapur, June 29, 2021 (TYO): Mongulbarnü Chief Minister, Neiphu Rio-i Chief Justice of India, N.V. Ramana den ajuruteput. Iba mapang CM Rio-i CJI Ramana dang Nagaland asoshi High Court balaka amenoktsü atema teyari meshi.

Maneni, CM Rio-isa Hombarnü Minister for Law and Justice, Communications, Electronics & information technology (IT), Ravi Shankar Prasad dena ajuruteputa liasü.

Iba mapang Nagaland Rio-i Union Minister Ravi Shankar den

Nagaland nung digital sector renlokdaktsütsü dak sendakba onüktem lemsatop.

Tenatisa Nagaland nung High Court ka amenoktsü onüktem jembita ta CM Rio-i Twitter nung metetdaktsü.

"Union Minister-i akokba tashi yariteptsü nangzükba atema pelar" ta Rio-isa metetdaktsü.

Union Minister, Ravi Shankar Prasad indang office-ia sangdong ka nung Nagaland chief minister den digital sector renlokdaktsütsü indang onüktem jembiteput ta metetdaktsü.

Nagaland CEO melenogo

Dimapur, June 29, 2021 (TYO): June 29, 2021 nungi Nagaland nung V. Shashank Shekhar, IAS-i Chief Electoral Officer, Nagaland inyak tenzükogo.

Shashank-i Abhijit Sinha ket nungi CEO mapa agizükogo, ta Chief Electoral Officer, Nagaland indang office-i sangdong ka

nung metetdaktsü.

CEO Nagaland tasen indang temettsütem:

V. Shashank Shekhar, IAS
Mobile No. - 9711511379
Telephone No. - 0370-2290460
Fax No. - 0370-2290460
Email ID -
ceo_nagaland@eci.gov.in

NSF-i state sorkar dang school fee magitsü tuyutsü mepishir

Dimapur, June 29, 2021 (TYO): Nagaland nung aliba school ajak nung fee magitsü atema tetuyuba agüjang ta Naga Students' Federation (NSF)-i tanü state sorkar ayongzükogo.

Okadak balalai tetuyuba agütsüba den liromedema sorkari tetuyuba agütsütsü, ta NSF-i ashi.

Nagaland nung online class agiba mapang sorkar tesayur teimba kati mapa meinyakba nguogo anungji sorkari 'no work, no pay' policy akangkanga beshitsüla ta NSF-isa takhangba agütsü.

Covid-19 wara ajanga education sector nung tamajungtiba kongshiogo aser iba wara ajanga kaketshirtem tarutsü nung timtem bentsür arutsüsa kumogo, ta NSF president Kegwayhun Tep aser general secretary Siipuni Ng

Philo nati ashi.

Yimtsung amala tesem nung technology junga maliba ajanga kaketshirtemi timtem ajurur anungji shia meteta aliba lanurtemi kaketshirtem yaritsü mepishir. Külen, teaching-learning maparen timi inyaka aotsü atema rongsenkettsung jenjang junga aliba tsüraburtemi pei chirnurtem indang school fee mapang shitak nung agütsütü ayongzük, ta NSF-isa metetdaktsü.

Yaküm wara mapang Nagaland nung Catholic nung aser ano tanga shisaliok rejutemi sensaker kaketshirtem nungi fee magii yaritepba atema tenüngsang agütsür, ta parnokisa ashi.

Mongulbarnü Kohima nung NSF-i School Education principal director Shanavas C den senden amendang sorkar nem takhangba agütsü.

July 1 nungi bank inyakim aika melenshitsü ATM & bank nungi sen agizükba atema taa agitsü

New Delhi, June 29, 2021 (Agencies): India nung July ita nungi banking sector nung inyakim aika melenshitsü.

State Bank of India (SBI) indang Automated Teller Machines (ATMs) aser kongsangtem nungi sen agizükba atema taa agiba aser inyakim meypa repringshio.

Taruba ita nung tax agütsür kari Tax Deduction at Source (TDS) talila agütsütsüsa akümsü.

- 1) SBIATM Withdrawal Charges agitsü: SBI nung zero-balance account amshirtem dak alaka SBI ATM mesüra kongsangtem nungi sen agizükba atema taa agitsü. SBI account-holder temi pezüben tashi SBI ATM mesüra kongsangtem nungi sen agizükba atema taa magitsü saka iba sülenbo, sen agizük shia Rs 15 den Goods and Services Tax (GST) agitsü. (Maneni tapak 2 nung...)

COVID-19 Nagaland: Nisung 1,381 anepaludar

Kohima, June 29, 2021 (TYO): Mongulbarnü Nagaland nung nisung 94 dak COVID-19 aliba putet aser 108 taneptsü angu.

"Tanü nisung 94 dak COVID-19 putet. Parnokji Mokokchung nung 26, Dimapur nung 21, Kohima nung 14, Peren nung 8, Kiphire nung 6, Phek, Tuensang o Zunheboto nung pungugu (5) aser Mon o Wokha nung anana (2) lir," ta Integrated Disease Surveillance Project atema State Nodal Officer, Dr Nyanthung Kikon-i ashi.

"Tanü COVID-19 puteta alir nisung 108 taneptsü nguogo. Parnokji Kohima nung 41, Mokokchung nung 23, Dimapur

nung 18, Phek o Tuensang nung terer (10), Mon nung 3, Peren nung 2 aser Wokha nung 1 lir. Parnok züngsema taneptsü angur ajak agi nisung 22,534 kumogo" ta paisa metetdaktsü.

"Nagaland nung COVID-19 nungi taneptsü angurji 89.73% kumogo aser tang nisung 1,381 anepaludar. Mongulbarnü COVID-19 puteta alir asüba maliasü" ta Dr Kikon-isa ashi. "Nagaland nung COVID-19 alitsü akok ta temolung melemi bilemba sample 2,23,839 tendangogo. RT-PCR ajanga 97,292, TrueNat ajanga 61,341 aser Rapid Antigen Test ajanga 65,206 tendang" ta Dr Kikon-isa ashi.

"Hombar tashi nung nisung 4,25,371 nem COVID-19 vaccine indang dose 4,83,711 agütsüogo" ta State Immunization Officer Dr Ritu Thurr-ia ashi.

Vaccine agirtemji frontline workers 60,099, healthcare workers 15,796, arishi kum 45 ser temapur 1,48,850 aser arishi kum 18 nungi 44 tsungda alir 2,00,626 lir, ta paisa ashi.

"Vaccine agirtem rongnung nisung 58,340-i dose anaprong agiogo. Parnokji frontline workers 28,818, healthcare workers 10,441, arishi kum 45 ser temapur 19,070 aser arishi kum 18 nungi 44 tsungda alir 11 lir" ta Dr Thurr-isa ashi.

Gurugram nung Naga nunger 2 asüba bushisüngdangtsü akhanger

Dimapur, June 29, 2021 (TYO): June 24, 2021 nü Gurugram nung Naga nunger ana taitüsü keta asüba bushisüngdang ta Additional Commissioner of Police, PERS, SPUNER, New Delhi dangi shidi zülüogo.

Iba shidi ya Additional CS & Chief Resident Commissioner, Nagaland House, New Delhi, Jyoti Kalash-i zülü.

Jyoti Kalash-isa shidi nung Addl. Commissioner of Police aser SPUNER in-charge dang Naga nunger ana asüba jungjunga bushisüngdanga osang agütsütsü aser ibaji Nagaland sorkar dangi tekaratiba nung bener yoktsü shiogo.

June 24, 2021 nü Alpha Hospital, Sec-10 Gurugram nung Rosy Sangma asü. La ya ICU nung lia ice-cream achiba sülen asü. Külen, Gurugram nungsa Rosy'er kinunger Samuel Sangma pa amongba takdang nung süngzü agi alenseter aliba angu, ta Kalash-i ashi.

Nisung anaprong asüba nung

taitüsü keta lir aser Samuel Sangma tebui tatalokba indang osang tejanga agütsüogo.

Samuel tebui agütsüba osang nung Samuel-i Alpha Hospital nung Doctor aser Nurse tem den tebang agi raratepba video ka indang shisema lir, ta Kalash-isa metetdaktsü.

Iba video-recording ya social media nung kanga prokshiogo aser iba nung taoktsü osang keta lir. Iba video nung Delhi/Gurugram nung alir North-East nunger kumzükka ayutsüba indang onüktem dena lir, ta paisa ashi.

"Nagaland sorkari iba tatalokba atema mepelaba metetdaktsüogo aser iba ajanga North East nung aser talisa Nagaland nung mepetmesü adoktsü akok" ta Jyoti Kalash-isa ashi.

Naga Students' Union Delhi (NSUD): Social media nung video prokshiba anguba sülen Naga Students' Union Delhi (NSUD)-i iba anogo nungsa Samuel den phone ajanga jembita, ta NSUD lennir kati ashi.

"Onoki pa den jembita aser tatalokba osang asüngdang aser NSUD-i yaritsü ta pa dang nangzük. Onokisa pa dang Delhi Police Special Unit for North East Region (SPUNER) nem osang sangoktsüogo aser kobi melii police telok ka tesem tonga arutsü ta ashi" ta lennirisa ashi.

Ajisüaka, tasungji hotel takdang ka nung Samuel soseta asü. Iba atema state sorkari CM corpus fund nungi Rs 1 Lakh tenla agütsü aser ibaji süngdentem aliba aser mang belenba nung amshi, ta kaketshir lennirisa shisem.

Naga Students' Union, Delhi unit-isa Samuel Sangma indang post-mortem report meshiogo.

"NSUD-i nübor tenzüktsü atema inyaker saka YouTube nung nisung kari NSUD aser state sorkar aitsüba atema sasa bilemer. Ajisüaka, tasür kibong yaritsü atema onok memejangi mapa inyaker aser maneni nübertem asoshi inyaktsü" ta NSUD lennirisa metetdaktsü.

Finance Minister-i scheme tasen 8 osang sangoktsü

New Delhi, June 29, 2021 (Agencies): Finance Minister Nirmala Sitharaman-i Hombarnü India nung Covid wara ajanga rongsenkettsung tsütsü takoksa bentsür aruba shia arudaktsütsü atema teyari agütsüba osang aika metetdaktsüogo.

"Onoki rongsekettsung tsütsü teyari ti (8) agütsüba osang metetdaktsür aser iba nungi onük pezü tasen aser ka health infrastructure indang lir" ta Sitharaman-i ashi.

Union Finance Minister-i Covid agi timtem bentsür aruba sectors nem Rs 1.1 lakh crore loan guarantee scheme agütsüba metetdaktsü.

Maneni, laisa Emergency Credit Line Guarantee Scheme (ECLGS)

scheme atema Rs 1.5 lakh crore limit enhancement talila lemsüktsüba ashi.

Centre sorkari India semdangi arur tourists lakh 5 nem visa angati agütsütsü aser registered tourist guides, travel aser tourism den sendaktep alir nisung 11,000 tema nem senotsü teyari agütsütsü, ta Sitharaman-isa ashi.

Union Finance Minister-i sangdongba:

- # Health sector atema Rs 50,000 crore. Health dak sendakba maparen atema 50% aser mapatong tasentem atema 75% guarantee coverage agütsütsü.
- # Aspirational district tem ulushitsü aser mapatong tasen inyaktsü atema 50% guarantee coverage.

Health sector nem 7.95% nung Rs 100 crore loan tashi agütsütsü.

Mozü kitem nung paediatric care/paediatric beds atema Rs 23,220 crore agütsütsü.

ECLGS kübok nisung lakh 25 shi tajangzük angutsü. Micro-finance institutions ajanga sen apur nem Rs 1.25 lakhs tashi aputsütsü.

November 2021 tashi sensaker nem jangotsü angati agütsütsü aser Rs 2.27 lakh crore endoka Pradhan Mantri Gareeb Kalyan Anna Yojana mapa inyaktsü.

Fertilizer subsidy atema Rs 14,775 crore talila lemsüktsütsü aser ibaji Rs 85,413 crore budget nungi talila agütsüsemtsü.

Covid putetaka meshirangertem pei kidang takdang balaka nung mongdaktsür, idangji -

Pei alidak aser ayipdak mopong aitsüsa kichiba (window & ventilation) lapoka yuang. Akok tashi süngjanglijang aser süngolemba agi tua chiyongtsü tajung chiang aser tzü aser juice jemang. Pei meyong mobile phone, kumesü aser toothbrush nunger ama melentepa tamshi. Mozü achitsü agüja lira, aji shitak chiang. Tango junga mesashitba, teku ashiba, aketba aser temang metaba timtem lira yakta doctor bushiang.



Tir Yimiyim

Advisor Yhokha-i sorkar mapa inyaker ayongzük



June 29, 2021 nü DPDB conference hall, Kohima nung Advisor, Technical Education, Medo Yhokha mendenpuba sür senden amenba noksa nung angur.

Dimapur, Aami/June 29 (TYO): Kohima District Planning and Development Board pur senden June 29, 2021 nü DPDB conference hall, Kohima nung Advisor, Technical Education, Medo Yhokha mendenpuba sür mena liasü.

Iba senden nung jembiba mapang, District Planning and Development Board sabang kübok nüburtem tenzüksü asoshi telok ka ama mapa nungloksüba asoshi Nagaland sorkar dang pelaba oleb ka Yhokha-i lemsateoa liasü aser tashidak wara agi kongshia alir asoshi bilemstüba lemsatepa liasü.

Nisung ajak timtem balala ajurua lir, anungji sorkar mapa inyaker lenirtem aser staff tem ya nübur ajunga kumzük

ayutsü mechi nükrangdong ka ama alitsüla, ta Yhokha-i ayongzük.

Tashidak wara mechi mapa senzük meyuksüla, ta pai ashi aser nüburtemi imlaba ama ataloktsü atema pei shilem mapa shidak inyaksü ajungshia liasü. Kasa mapang yimdak-yimtsüngtem nunga COVID-19 nungi kumzük alitsü yimyatem shidak amshitsü ajungshia liasü.

Nagaland State Biodiversity dak sendakba nung state nung People's Biodiversity Registers (PBR) ya July 30, 2021 tashinung renemtsü lir, anungji ketdangsürtemi iba indang osang tejangja ya board nem July 15, 2021 tashinung agütsüla, ajiasünung dang National Green Tribunal nemo

sang agütsü, ta Deputy Commissioner, Kohima, Gregory Thejawelie ajanga iba senden nung metetdaksü.

Iba senden nung North East Taekwondos Union aser Nagaland International Research Center Societies ya register asütsü atema board nung molunga agizük. Kohima DPDB ajanga 2021-2022 session atema nija indang kaket reju asem nem LADP 2021-2022 aser Grant-in-Aid agütsü asoshi state sorkar dangi temelaba meshia aben.

Iba senden nungsa sorkar office tem nung SOP tem ajunga amshia staff aser ketdangsür shilem 50 nem maparen balala inyadaksü atema jembiba liasü.

Tuensang DPDB senden nung COVID-19 vaccine indang jembiba

Dimapur, Aami/June 29 (TYO): Tuensang District Planning and Development Board pur senden June 29, 2021 nü Deputy Commissioner indang Conference Hall, Tuensang nung mena liasü. Iba sentong nung Deputy Commissioner aser Vice Chairman, Tuensang District Planning and Development Board, Kumar Ramnikant menden sür agi.

CMO, District hospital aser danga COVID-19 dak sendakba nung senotsü indokba nung yaritepsü atema iba senden nung züngsemtemi LADP 2021 nungi agitetsü jembiba liasü.

Tuensang District Planning and Development Board züngsemtemi district nung COVID-19 mozü agütsüba maparen indang süoka jembiba aser yimtsüngtem nung

vaccination campaign tem ayongzüksü aser yangji district nung ketdangsürtemi shilem agitsü lemteta liasü.

Iba vaccination team ya HoD ajanga anitsü aser yangji tribal hoho, arogo aser yimten nungi teshimtet nübutem alitsü. Iba telok yagi district kübok yimtsüngtem semdangtsü aser COVID-19 mozü agitsü tsüba aliba samadaksütsü asoshi sentong balala ayongzük agitsü, ta iba senden nung lemteta liasü.

HoD tem ya yimtsüng balalai mao tsüngta CMO ajanga parnok nem nungdakba training agütsü.

Tuensang nung Deputy Commandant Post ka aser Village Guard pur atema training centre ka amenoktsü atema iba senden nung jembiba aser iba sentong agizük mapa kuma inyaksü

atema temaba ketdangsür dangi abentsü lemteta liasü.

Yungphang Sector, Tuensang nung aliba Anganwadi center nung meter 100 CC tetsüng lenmang yanglutsü atema parnok jembiba aser parnoki department dangi yoktsü aser ano maneni Chairman, Tuensang DPDB dangi yoktsü lemteta liasü.

Tuensang District Planning and Development Board nung All Ward Union Tuensang Town nungi teshimtet nübu anioktsü atema jembiba aser parnoki chairman, Tuensang DPDB dangi yoktsü lemtet.

Department inyangshih indang osang iba senden nung PHE department ajanga agütsü aser taruba senden nung Department of Fisheries and Aquatic Resources nem iba mapa nunglokja liasü.

Peren nung COVID-19 mozü agir kanga ajema lir

Dimapur, Aami/June 29 (TYO): Peren District Task Force on COVID-19 aser Vaccination Committee pur senden ka Deputy Commissioner indang Conference Hall, Peren nung June 28, 2021 nü Deputy Commissioner & Chairman, District Task Force on COVID-19, Peren, Sentiwapang Aier, NCS lenisüba kübok mena liasü.

Iba senden nung district nung COVID-19 jenjang aser mozü agütsüba indang osang agütsüba mapang, tang district nung COVID-19 active cases 71 lir, ta Dy. CMO, Dr. Lanuakum Jamir-i metetdaksü.

DIO, Dr. Kiholi ajanga COVID-19 mozü agütsüba indang osang lemsatepa mapang, June 27, 2021 tashinung healthcare nung

inyaker, frontline nung inyaker, nüburtem arishi küm 18 aser 44 tsüngta alir aser arishi küm 45 nungi tema nem COVID-19 mozü doses 14,637 agütsüo, ta metetdaksü.

District nung COVID-19 positive cases kanga kera zünba dak sendakba onüktem senden nung benoka jembiba. Iba dak sendakba nung nüburtemi COVID-19 mozü molungsoa magiba, COVID-19 tashidak tsüngsü pua aoba mapang nüburtemi tashi mangaba, nüburtemi COVID-19 nungi jenbuttsü yimyatem mamshiba, ward/village task force mapa meinyakba aser social media nung COVID-19 mozü dak sendakba olulu mesüra osang taila prokshiba indang süoki ia jembiba liasü.

District nung COVID-19 mozü agütsüba maparen kanga

nüshia renloka aiba atema khuret lemsatepa mapang, nüburtem molungsoa tejakleni maru tashi district nung iba maparen bilemba ama meinyaktetsü, ta Deputy Commissioner ajanga ashi.

Iba dak sendakba nung Deputy Commissioner, Peren, Sentiwapang Aier ajanga lokti tentet balala aser tamangba yimsü nung ajemdaka aliba tentet tem dang district administration aser health ketdangsür den amalitepsü ayongzük liasü.

NZPO tir-ia Peren district nung aliba nübur ajunga dang sorkari latetja aliba SOP tem sülen anidaktsü, frontline worker den tashi angatsü, mozü agitsü, olulu prokshiba nungi pila alitsü aser district nung iba tashidak azüokba nung shilem agitsü ayongzük liasü.

District/State Teachers Award 2021 atema metetdaksür

Dimapur, Aami/June 29 (TYO): Government aser Private School shirnoki State Curriculum anidaka pei mapa ajanga shisaliok jenjang renlokaksüba nung shilem agi aser kaketshirtem takum nung terenlokba kadaksü, parnok nem District/State Teachers Award 2021 agütsü atema parnok inyakba tesem nung Administrative Officer/ Head of Institutions aser Village/Sub-Division/District level nung aliba shisaliok wadang nung dena aliba NGO temi tenung agütsüla, ta Principal Director, School Education, Shanavas C, IAS ajanga sangdong ka nung metetdaksü.

Nomination form aser iba sempet agütsü asoshi temsüa

aliba jenjang tem ya department indang website <https://education.nagaland.gov.in> nung angutsü.

Maneni State Curriculum sülen anidakba Government aser Private School tem nung inyakba tesayur shirnok teti atema temang nung matamabensa ali/taneptsü mongutetba tashidak agi shiranga ali/alimar lendong ajangshia mapang talangka shiranga/temang anepalua danga nungi teyari kecha mebushi ali, parnoki department indang website nung aliba format nung Financial Assistance atema apply asütsü akok, ta ashi.

Nomination Form aser Financial Assistance atema application from ya pei inyakkak DEO/SDEO nem July 16, 2021 tashinung agütsüla, ta metetdaksü.

Nakachari nung Aor lenir tongtibang ka süogo



Imsü Jamir

Dimapur, June 29 (TYO) : ssam nung Jorhat district kübok Nakachari nung senso küm arogo aser lokti maparen nung tongpu apua tenzük alisang, tebu tedi Imsü Jamir yashi Hombar nikonngtsütsü par kidang Nakachari nung lia alima nungi pilaogo. Pa arishi küm 90 liasü.

Pa ya Lirmen nung aser akhidang British nung mapang NEFA ta aliba mapang nung Medical department nung inyaka liasü aser yang nung jagi mapang matong dang pasasa mapa nungi anener Nakachari nung senso kuma alitsü tenzük.

Pa Nakachari nung aliba ajanga Naga nung o Assam

nunger na tsüngda yimjung apu latepa maparen aika nung putepa lia aruogo. Pa asüba anogo tashi nunga pa ya Assam aser Nagaland Border Peace Coordination Committee nung tadong tir liasü.

Pai temulung agütsü inyakba ajanga 2005 küm Nagaland anasa aliba Assam arogo 50 longjemer Assam Valley Baptist Mission tenzük tanüla anir aruba mapa inyaka liasü. Pa ya 1952 küm Nakachari Ao Baptist arogo nung deacon inyak tenzükba nungi arogo seretary dena inyak aser pa asüba anogo tashi nunga par Nakachari arogo nung tongti tenzük ka liasü.

Tanü Mongolbar nü par alidak Nakachari nung asü pila sentep tajung ka agir, yangji Ao Arogoi mesemtetba leper nung pa mang rema yutsüo.

Pa mapang tatsüka temang mejungi lir külen, par jala ana aser jabaso ka den semchirsemnur aser kinunger aika toktsür teti anisüngzük tepeladaki ogo. Pa kinungsüa, pa dang tama, küm ana jakdang alima nungi pilar liasü.

July 1 nungi bank inyakyim... (TAPAK 1 NUNGI...)

2) Cheque Book Usage Charges teimba akümsü: July 1, 2021 nungi SBI nung Savings account holder atema 'free cheque leaf usage' telatet dang agütsü. Account holder kati financial year ka nung cheque leaves 10 dang amshitetsü aser iba sülen cheque 10 amshiba atema Rs 40 den GST agitsü mesüra cheque leave 25 amshiba atema Rs 75 den GST agitsü. Emergency Cheque Book amshiba atema leaves 10 nung

Rs 50 den GST agitsü. 3) LPG Cylinder jenjang melenshitsü: Ita shi mezüed anogo nung liquefied petroleum gas (LPG) cylinder indang jenjang reprangshimer anungji July 1 nungi jenjang melenshitsü. 4) Syndicate Bank indang IFSC Codes tasen agütsü: Syndicate Bank aser Canara Bank ka kuma loktepa ajanga Syndicate account holders asoshi IFSC codes tasen agütsü.

MOKOKCHUNG DISTRICT TASK FORCE COVID-19

IN COLLABORATION WITH
Mokokchung Town Baptist Church (MTBA)

COVID CARE CENTRE

(For COVID-19 positive individuals)

Facilities Include

- Daily Nutritious Meals.
- Daily Counselling & Prayers.
- 24/7 Health Monitoring & Doctor Consultation.
- Oximeters and Oxygen Concentrators.
- Transportation Services.

Anyone requiring Admission
Please Contact Helpline Number

9862 324202
9890 962231
7005 643192
8837 278291



Assam kübok Dhubri district nung aliba Rupsi Airport kum 38 tashi shibanga yur lapokba sülen tanü anogo 50 tashi maparen inyaka arur. Director General of Civil Aviation (DGCA)-i May 8, 2021 nungi Rupsi Airport lapoktsü temelaba agüja liasü. Deobar tashi nung Rupsi Airport ajanga passenger 2,700 tashi senzüogo ta airport kettangsürtemi ashi,

Assam nung tanur 34 tashi COVID-19 ajanga asü

Guwahati, June 29, 2021 (Agencies): Tesüiba ita asem tsüingda Assam nung tanur 34 tashi Covid-19 ajanga süogo ta National Health Mission (NHM), Assam-i metetdaksü. Iba mapang tanur 34,606 tashi COVID-19 agi shiranga liasü, ta parnoki ashi. April 1 nungi June 26 tashi Assam nung nisung 2, 80,504 dak Covid-19 puteta liasü. Tanur 34,606 rongnung arishi kum 5 teküpok 5,755 aser arishi kum 6 nungi 18 tashi 28,851 liasü. Assam Community Surveillance Programme indang phase 3 mapa inyakba nung COVID-19 aliba tsürabur mesüra guardian dak nungi tanurtemi virus menaba bushitetogo, ta health kettangsürtemi ashi. Arishi kum 5 tain tanurtem rongnung parnok 34 dak temang nung tanga tashidak liasü.

Amra Bangali-i Tipraland Bill anema lungkak ait

Agartala, June 29, 2021 (Agencies): Tripura Tribal Areas Autonomous District Council (TTADC) indang session nung Greater Tipraland Bill agizükba anema Amra Bangali-i lungkak aitba sentong ka agiogo. Anogo pezü tejakdang ADC session nung Greater Tripland Bill agizüka liasü. Tipra Matha party-i iba bill ya benok saka opposition BJP MDC temi anema menokdak. Hombarnü Amra Bangali indang State Committee-i iba bill magizüker ta sayua lungkak aitba sentong ka agi. "Tripura ya kin temeyoktep aliba state ka lir. Yangi Sixth Schedule Act mamshir. Left yimsüsüba mapang Constitution yanglushiogo. ADC area ya state nung shilem asemsü lir" ta Amra Bangali state secretary, Gouranga Pal-i ashi. "Parnoki Greater Tipraland tenung amer Tripura ajunga dena Tipraland kumtetsü meranger. Iba mapa ya tim masü aser mebilemdangi inyakba mapa ka aser onoki magizüker" ta paisa metetdaksü. "Left temi kasa tangatetba nung inyak. Tarutsü anogotem onoki iba tasa anema noktaksü nübortem ayongzükker" ta Gouranga-isa ashi.

Tetsür ka bank telung nung shibanga aliba angu



Shillong, June 29, 2021 (Agencies): Meghalaya nung arishi kum 40 tain tetsür ka June 25, 2021 anepdang samar bushitepa aru aser Mongulbarnü la Meghalaya Rural Bank Office, Shillong nung shibanger aliba nguogo. Tetsür la samaba sülen social media nung iba osang belenshia liasü. La ya New Kench's Trace, Bishnupur nungi sama. La ya Meghalaya Rural Bank office nung shibanger lia angu aser la temang kanga tashi mait lir. Osang angazükba agi lai bank nungi sen auyatsü merang saka ibaji meinyaktet. Anogo ishika tejakdang la bank jagi ao aser bank telung nung atsük, ta osang ajanga ashi. La ket nung amtsük aser ORS dena chiyungtsütem bena liasü saka ibaji anogo ka mesüra ana atema dang liasü. Anogo 3-4 lir külen ang bank lapoktsü ta asüba lai memetet liasü. Iba tetsür lai bank telung nung aliba CCTV camera kar agien aser sen kar auyatet. Saka tia maka bank shibangba ajanga la telung nungi madokteti timtem.

Assam Congress president tasen shimtsü

Guwahati, June 29, 2021 (Agencies): Tan hopta tsüingda Assam Congress president tasen shimtsü, ta APCC general secretary Apurba Kumar Bhattacharjee-i ashi. Assam Assembly election nung tamakok anguba sülen Ripun Bora-i Congress president nungi anenba sülen ita ana shi süia arur iba osang metetdaksüogo. "Tan hopta Assam Congress president shimtsü. Central lennirtemi osang metetpeladar" ta Bhattacharjee-isa ashi. Iba mapa inyaksü atema lennir aika lir saka party high command-i nübo tajungtiba shimtsü, ta paisa ashi. "Onoki kümsük tanaben atema assembly election nung tamakok angu. Onoki alizung metongtet. Party-i o jembir aser mangdang tajung aliba lennir ka aginür" ta Bhattacharjee-isa metetdaksü. Assam nungi Lok Sabha MP Pradyut Bordoloi aser All India Congress Committee (AICC) general secretary Bhupen Bora na rongnung ka shimtsü akok ta party nisung karibo shiogo.

RINGWORM, ECZEMA ASER TEMANG MESAKBA AGI TIMTEMER ASÜ?

HAO

Ringworm, Itches & Scabies nung tangsa süngzükker

ZALIM LOTION
For Ringworm and Itches
जालिमलोरिन
राव, खुनसी की दवा

ZALIM LOTION
Fastest > Trusted > Tested
...By Generations

Medical store nungi aliang

Retailers may also buy online : www.zalimlotion.in ✉ zalimlotion1929@gmail.com



TIR YIMYIM

YIMOBILEM (EDITORIAL)

DIMAPUR RASEMNÜ, AAMI (JUNE) 30, 2021

Asenokbo nütsüng nungdaker

Tang ama alima tashidak wara agi nisung remer merema asüba osang alima tesem aika nung atalokaka, tang tashibo alima nung shitakba tebilemtsü yabo nisung asüba ya masü saka asoba ya lir. Aji oda, alima nung Tsüngremi yanglua toktsüba rongsen yari nungdak ajak peria ayongayonga alitsü asoshibo, alima nung nütsüng teimtiba agia billion 3 shi dang asütsüla, ajisüaka tang ya alima nung nütsüng billion 8 junga kümdagi aser küm semer sülen 2050 kümba alima nung nütsüng yongsük billion 10 jungnua asütsü ta alima rongsen aser nütsüng yongsük renlokba sükdanga bushidangertemi sükdangtetter. Tetezü, tang 2021 küm tashi nung yabo alima nung nütsüng talila billion 5 dak tali lir. Iba jagi alima nung nungdak agi peria jangratema alirtem dang nungibo anogo nung tebok sünga chiyongsüa mangu, ayipdak maka aser aluyimdi asünunga ali maka ta timtemertem teimba lir. Item timtem ajak ya tetenzükdak moktenjibo kibong nung apuani sentong majungba ajanga tanur aika sotena yur memesütet mashimashi sükshidaktsüba ajanga adoker. Iba tebilemtsüji reprangteta 1989 küm United Nations Development Program ajanga anogo ka shiteta " Alima nütsüng " (World Population Day) amongtsü lemtet aser iba anogoji July 11 shimteta 1990 küm nungi alima ajaklen amongtsü tenzük. Aji oda, alima nütsüng anogo yabo tanga anogomong amato pelatepa amongba anogo ka masü saka alima nung nütsüng zünba asoshi shisabolua bilema amongba anogo ka lir. Ibayongji, iba alima nütsüng anogo yabo July 11 nüji dang masü saka June 27 nungi July 24 tashi, ita ka piyong alima tesem balala nung nütsüng zünba tebilemtsü aser timtem ajuruba indang jembir aser kasa anogotem nung tanur ajema asotsü asoshi mozü kidang inyakerteri nübortem nem tangatetba agüja maparen tapu balala nung yarir. Taküm 2021 küm asoshia item anogotem aser mapangji tang ya lir. Aji oda, kodang asenoki alima nung nütsüng renlokba tebilemtsü aser nütsüng ajemdaktsütsü sentongtem agiba nükjidong indang bilemdangdir, shitakba asenokia asenok tashi yari, asenoki anepalutettsüsa kibong nung tanur asotsü bilemtsübaji kanga tongtibang lir. Ajisüaka, ano külen kodang asenok state nung nütsüng yongsük o ali tazazük na medemdanga reprangdangdir, ashiko, asenokbo nütsüng ajemdaktsütsü merangtsüba masü saka nütsüng renlokdaktsütsüang merangtsüla ta ajungshiteptsüsa angatettsüa akok. Tang ya Nagaland state ali tazazük square kilometer 16,579 nung alir nütsüng 2011 küm asadanga nung nütsüng ajak agi 19,78,502 liasü. Tetezü Nagaland ali ya nütsüng jagi lemdu asünungbo, nisung 119 shia ali square kilometre kaka atatsü. Ibaji kodang asenok kidanger state-tem den medemdanga reprangdangdir, Assam nung sq km shia nisung 398, Meghalya 132, Manipur 115, Mizoram 52 aser Arunachal Pradesh nung sq.km shia nisung 17 dang ataba jenjang asenoki angur. Iba jagi Arunachal Pradesh aser Mizoram nungbo yimsüsürtemi anir par state nung nütsüng ajemtsüba masü saka züintsü merangtsü asoshi, tanur aika asortem nembo senpet dena agütsütsü renema yur, ajungshitepba osang asenoki angashiogo. Aji oda, kodang asenoki asenok jenjang ya asadanga shitakba nung metettsü merangdangdir, Nagaland nung nütsüng yongsük lakh metsü shi aliba nung jagi, ashiko, Naga nung lakh ter-a majung alitsüa akok, kechiyong asen lima nung nütsüng yongsük sükdangba maparen nung asenok nisung aikati aiben zülüoker aser ano Dimapur nungbo lisopurtem dang nungibo tangar bendangertemang teimba lir. Ibaji kodang asenoki süoki ia bilemdangdir, kenü shitakba nübo nungdaka jatepdi ta asüba tensa mapang arudangbo, asenok nübo agi anungtsü. Atangji, nütsüng aika sayuba agi asenok town-tem jenjang atutsüa akok aser center government nungi teyari talila shitakba nütsüngtem dang nungibo taila nütsüngtem indang shilemang teimba aser tuluba angutsüa akok. Ano, election anogo nunga taila vote ajakji agütsütettsüa akok. Ajisüaka, alima tensa mapang majung ka arur rarai odi asüdangbo, taila nütsüngtemjibo tongpang nung menokdaktettsü. Alima (state) ka yateta akümtsü asoshi tenüngdaktiba anaji, ali o nütsüng na ya lir, kechiyong nütsüng aika asüyonga ali mekara kong oa alima akümtsü aser alima aliyonga nütsüng melira shiba alitsü aser shiba anüktsü. Ibaji kodang bilemdangdir, tang asenok nütsüng ajemba jenjang yagibo, shitakba alima nütsüng renlokba aser samatsüba indang bushidangertemibo 2400 kümba alima nung nisung kata mali samatsü shia lir, saka asenok Aor aser Naga nungbo aji matongdang alijak nungi ajak samadoktsü ana nung lir.

OLEMSABANG

TAIWAN BAPTIST AROGO NUNG INYAKBA AJANGSHIBA ASER INYAKYIM

~ Imliyanger Jamir

(Yashi adok nungi...)

Taitung Baptist Arogo (International fellowship) aser special tekülem Special tekülum mapang lia arudagi, iba ya International fellowship dak sendakba tekülum sentep lir. Yangi kibong nung shir tanur mesüra tain person with disabilities-tem lir aruagi atener. Kibong karbo Khristan masü sür nung arua pelashishia atener. Tsüngrem osang abentsü kanga tetemsü mapang ka iba ya ka lir. Deobar sentep tekülem mapang den masü saka devotional sentep matong dang ghonda ka jillia agir. Saka tang pandemic aliba agi magiteti lir saka kodang tensa junga küma odir iba special sentep ya tenzüktsü. Tsüraburtem atenshia discussion mapang alir, aser tanurtem lanur taintemi repranga atar. Tsüraburtemi kuli asüba iba ama discussion mapangajanga tangazükba aika alir. Anungji, asenok Ao arogotemia iba ama kasaji inyak nung tajung asütsü ta nibo bilemer aser ajungshir.

Sarasadem telok

Ni talidak town nung arogo kwi lir ajaki lemteta sarasadem telok ka tenteta lir aser ita ana nung ken ajurutepa sarasadem mapang alir. Iba telok nung Khristan arogotem (Catholic-tem maten) ajak atener aser telongjem nung mapa inyaka aor. Mapang shia program balala achayanger, tatishitsü ka Khristmas benjong ama, Good Friday, Easter Sunday, Pentecost anogo ama ajak telongjem nung shilem tulu agia aor.

Tanabuba nung Taiwan nung kanga sabua inyakba sarasadem sendong RPG (Revival prayer group)tasa ajar, Baptist Arogo dang masü, saka ano denomination balalai iba inyakyim ya kanga takok manung inyaka odagi. Iba prayer group ya nisung ana mesüra asem dang alir, aser mapang achayangtsü jia melamela phone ajanga mesüra sentepa agiteter. Iba prayer group nükjidongji asenok nija revive asütsübaji dang masü saka nütsüng shiai kibong aser lokti asoshi rangben temoatsü asütsüba nükjidong nung aor. Iba RPG ya denomination dak sendakba mali. Sarasadem metenzükdang nisung shiai tenüngsang, Tsüngrem nem tutushi aser nü den külemi sarasademakhuret abener. Iba sarasadem telok ya kanga takok ngua bener odaki. Sarasadem mapangjibo pei telok tongtepratepa agir, talisa mazüngi alirtem asoshi kanga temoatsü lemanng ka ta nübortem sa kuli asür.

Taitung area Baptist churches telok

Sarasadem telok den ano Baptist arogotema telongjem akar. Ita ana nung ken meeting akar aser sarasademba den ano sendong külemi inyaka aor tatishitsü ka V.B.S. (vacation Bible school) Baptist arogo ya kanga tulubo masü asünungji V.B.S külemi achayanga inyaker. Iba den ano küm tatem mid night service-a külemi sendong yanglua agir. Taiwan rangben Baptist arogo teloktarutsü nükklaji noklang ka (100) church planting sendong nung aser sarasadem nung lir. Telongjem nung mapa inyaksü koda jangratemtsü aser khuret a külemi abener. Yangi tangazüktsü lesson tulu lir.

Telongjem nung tenzüktsü koda jangratsü

Tenüngsang Ken133:1 nung zülua aliba ama, "Ajiang, adianutem külemi telongjem nung alitsü koda tajung aser jangratemtsü lir!"

Asenok Ao arogoa külemi tenzüktsü koda tajung asütsü. Tenzükterm telongjem nung lira nübur tema telongjem nung alitsü. Tenzükterm majungra nübur tema tesünep tepela nung malitsü. Ashiba ama "tetemsü arogo ka ta mali" saka kokra asenoki küm shia mera tasen nung anitsübaji asen Tsüngrem tenzükterm khuret tulu lir. Tetemsülen masü saka tajungbalen, nükjidong tasen aser tangazükba tasen den tanela nung temoatsü ngüa anir aotsü merangdi.

Tatem o

Taiwan ya linük tila ka, population 23.57 million dang lir. Khristantem 5% teküpok saka parnok telongjem akaba agi, meranga tenzükba agi mission mapa kanga tashi ita inyaketeter. Missionarytem India, Myanmar, China, Malaysia, Indonesia aser ano tanga linük jagi yaria yoka lir. Yangi tongtipang ka ni ajitetbaji "Telongjem" "Akümtsübu" ta ni angur. Tashimait jia lir saka tajungba ni teimba ka ajiteteter.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

ICC-i Free Burma Rangers den senteper refugees yarir



Myanmar nung Kachin state anasa aliba IDPs camp nung Khristan melungtet telok - Free Burma Rangers-i tanurtem atema Good Life Club (GLC) camp ayongzüka agidang tangokba noksa nung angur.

June 29, 2021: Taküm February 1 nü Myanmar nung sepaitemi democracy lenir, Aung San Suu Kyi sorkar atsüngdoker yimsüsü tenzükba sülen Myanmar sepaia aser democracy pusemba teloktem tsüngda rara ajanga nisung aikati yimtsüngtem toktsür jenshiogo.

Pei ki toktsür jenshirtem aika Kachin state anasa aliba internally displaced people (IDPs) camps nung jenoka lir. IDP camps nung alirtem taküm alitsü atema melungtet telok balala dak dang metaloker aliba mapang nung International Christian Concern (ICC)-i Khristan melungtet telok- Free Burma Rangers (FBR) den senteper raraba tesem nungi jenshirtem yaridar.

Taküm March aser April ita na nung ICC aser FBR-i IDP camp anaben semdangogo.

March aser April ita na nung FBR-i camp pezü semdang aser

IDP 1,539 nem chiyungtsü agütsüba den külemi camp asem nung shiranger 150 yari aser mozü angati agütsü.

March ita nung Free Burma Rangers-i Khristan nütsüng timba aliba Kachin State anasa aliba BP8 aser BP6 IDP camps semdang. BP8 camp nung kibong 98 (nisung 335) aser BP6 camp nung kibong 43 (nisung 300) lir.

Item camp nung IDPs timbaka 2011 küm November ita nungi alir. FBR-i semdangba mapang nung parnok nem chiyungtsü, nüngdak osettem aser medical treatment agüja liasü.

April ita nunga FBR-i Kachin State nungsa IDP camp ana semdang; camp ana nungji kibong 191 (nisung 885) lir. Rong aser motorbike ajanga parnoki chiyungtsü aser medical supplies bener arua lema agütsüogo.

International Christian

Concern (ICC) teyari ajanga FBR-i jang, totzü, ango takong, sapon aser mozü agütsü. Camp anaprongla nungji FBR-i medical clinic ka lapoka malaria aser HIV densema tashidak balala agi shirangertem yaridar.

FBR-isa tanurtem atema Good Life Club (GLC) camp ayongzüka kentenmenü, saisapong, crafts aser otsü ashiba sentongtem agi. April ita nung GLC nung tanur 200-i shilem agia aden.

IDP camps nung aliba kibongtemi pei kidangi meyipa mouteter kechiyong parnok aliba tesem nung rara manener aser tensa tamajungba akümer.

"Myanmar nung rara aliba tesemtem nung jenshia alirtem yaritsü atema FBR asoshi maneni sarasademjang. Iba dak alia IDP camps nung alirtemi tang ama tensa mapang nung teimla angutsü atema sarasademjang," ta ICC-i metetdaksü.

UNHRC-i India aser Nepal nung minorities anema inyakba asadangtsü

June 29, 2021: Tawa Evangelical Focus Europe-i, World Evangelical Alliance (WEA)-i United Nations Human Rights Council (UNHRC) nem report ka agütsüogo, aser iba report nungji India aser Nepal na nung Khristantem nem tiyazü nung tai tongloktsüba atema linük ana aitsüba indang shia lir, ta metetdaksü.

Iba report ya human rights council 47buba senden nung metetdakja liasü.

Nepal nung Khristantem anema kanga inyaker. 2017 küm Nepal-i Penal Code tasen ka yanglua liasü, koba ajanga linük nung pastor tem aser Khristantem amokmerentsü atema police aser judicial nem tashi agütsür.

Kasa Penal code ajangasa linük nung Hindu yimsü kümzüksü atema tamangba yimsü meyipba nokdang. Nepal nung nütsüng shilem 80 bo Hindu nung lir.

Tawa Nepal sorkari Khristan organisation ana aija

Khristantem anema inyaktsü atema osangbener ka aser taoba mapang Hindu nationalist Deputy Prime Minister na nem tashi agüja liasü. Khristan organisation ana anema renemba document anaji tai, ta bushitetogo saka iba onük nung sorkari ola madoker.

WEA report nungji yamai shia lir, "Digital technology ajanga minority Khristantem anema inyakba aser pei tebilemba lemsateptsü atema Khristantem temeden anema inyakba atema sorkari tiyongi ia inyaktsü memelunger."

Nepal ama India nunga Khristantem densema minorities anema inyaker aser aiben minorities anema yazü jembir; Hindu nungertemi linük nung coronavirus tashidak ya Muslim nungeri metetsümonga proker ta aija liasü, ta WEA report nung shia lir.

"Meimchir temeden atema inyakba teloktem aser religious liberty watchdogs balalai India nung minorities anema inyakba,

tesempa o jembiba aser tiyazü nung tai tongloktsüba osang aika metetdaksüogo. 2020 küm India nung Khristantem anema inyakba ken o 327 liasü ta Evangelical Fellowship of India-i jangjaogo," ta WEA report nung shia lir.

India linük nung religious minorities anema inyakbaji alima linüktemi mapang talangka nungi meteta lir. 2021 küm report nung United States Commission on International Religious Freedom (USCIRF)-i India ya country of particular concern (CPC) linüktem rongnung züngoktsü benoka liasü, kechiyong India nung International Religious Freedom Act (IRFA) kübok religious freedom anema inyaker.

India aser Nepal nung nung minorities sendokba aser parnok anema inyakba atema alima linüktemi linük ana dang tasüngdangba akatsüla aser Khristantem anema inyakba ozüngtem melenshitsüla, ta WEA-i metetdaksü.

ANOGO ABEN TSÜNGREM DEN

Iba amala mapang tang shidak lir

"Aser ibala ama mapang asoshi na chuba yimli jagi arua ali shibai metet?" *Easther 4:14(b).*

Otsü ajunga nung Bendanger tashi Yihuda kinji samatsütsü merang. Anitet mapang nungi, Hitler mapang tashi, tang mapang Iran, kintem aser yimsüsürtemi Tsüngremer nübür alima noksa nungi indoktsü meranger. Saka Tsüngremi Abraham dang nangzük (Lip. 12:2-3; 17:1-8). Kodang tekülak Hamani Yihuda nung samatsütsü tasa tamajung agi chuba Ahasuerus mesüzük, Tsüngremi pa sentong tenzükadoker liasü. Inyakyim ka ajanga pai tebur tajung Yihuda nung aiür ka chuba dangi anir aru, shibai la chubatsür kümdaktsü. Kodang Yihuda nung samatsütsü tasa temai adok, Mordicai Esther dang tang mapa inyaktsü ashi, pai la dang iba ama mapang ka asoshi Tsüngremi na anir arua alitsüa shibai metet.

Kasa ochiji ne dena lir. Tsüngremi iba ama mapang ka nung iba meta yagi anir arua alitsü. Nai ajurur den sendakteptsü Tsüngremi na renemtsür alitsü. Yisu osangtajung proktsü asoshi Tsüngremi na amshitsü akok. Bill Fay-i pa kaket, 'Hoe to share your faith without an argument' nung ashir, Tsüngremi lenmang aika amshitsü akok, nai O merepteti jembiba, na metsüdakba, nai shinüba Lai tekong kong lir mengutetba. Pai amshitsü makokbaji na ola matoki alibaji lir. Tsüngremi na "iba ama mapang asoshi" yanglu ta bilemtettang. Nai tanü Estheri inyakba ama kechi atalokdir atalokang inyaktetsü asü ?

Kibuba, tanü ni Ne osang tajung tasü itta sangdongtsü kü dang yariang. Amen.

Khristantem dang 'Sign to Sing' petition nung sign asütsü mepishir

June 29, 2021: UK tesem tenüng sanga ken atentsü ajaklen Tenla kidang lokti ajungshir, ajisüaka sorkar kentenba nokdangba anema tetuyuba nung ajemdaker onoki Premier Christian ola madoki ken angatsüsa akümer. Iba ya tejashitsüka lir, kenchiyong tangar den longjemer

'Sign to Sing' campaign ken atenbaji sarasademba ayongzükertemi sorkar dang yimya balaka lir aser kentenbaji Tenla kidang lokti kentenba tekülem sentong nung tenokdangba agientsüla, ta tongtibang shilemka lir," ta ashi.

Paisa, "Sorkari July 19 nü tanünga tenokdangba timbaka agientsü sentong lir. Ibaji vaccination programme takok ngua agiba ajanga lir. Saisapong sentongtem aser benjung aika agitsü melatsü, ajisüaka Tenla kidang lokti kentenba melatsü asü memelatsüar memetet. Wembley aser pubs nung kentsentsü melar saka Arogotem nung osangtajung ken atenba maneni memelatsü amai bilemer. Ibajibo tim masü," ta ashi.

"Khristantem nem temeden agüja July 19 nungi tenzüka UK nung aliba Tenla ki ajak nung lokti kentenba melatsüla. Onoki tenzükba petition nung sign süang aser kokra tenla agüjang, koba ajanga sorkar dang onoki akhangba maparen nung yaritsü," ta pai ashi.

PCC-i akokba tashi aikati iba petition nung sign asütsü atema Khristantem dang mepishir. premier.org.uk/sing ajanga iba dang ola adoka Tsüngrem petition nung sign sütetsü.

OLONG PAITEP # 5860

1				2					3	
						4		5		
6			7							
					8		9			10
11										
12		13					14			
		15								
						16				
	17									
					18					

- | | | | |
|------------------------------|--|---|--|
| TIPLÉN | | LANGTSÜNGLEN | |
| 1. Yakob tetsü - (6) | | 2. ___ gki - (3) | |
| 4. Mezüng nisung - (4) | | 3. Telungpur telok ka - (2) | |
| 6. Tasen lai kakat ka - (5) | | 5. Tsüngremi mezüng poktetdaksüba - (5) | |
| 9. Au lanu - (2) | | 7. Tia - (4) | |
| 12. Tejen lai 21 buba - (11) | | 8. Yakob-er jabaso ka - (5) | |
| 15. Tekolak tembar - (2) | | 10. Abraham tebutü - (4) | |
| 16. Zütsüra anepsang - (5) | | 11. Rebeka kinungpu - (4) | |
| 17. Kain tenu - (4) | | 13. Esau tenu - (5) | |
| 18. Hana-er jabaso - (6) | | 14. Tzünglu tilala aru - (4) | |
| | | 16. Jafet tebu - (3) | |
| | | 17. Tekka agi kongshi - (2) | |

OLONG PAITEP # 5859 TELANGZÜBA

- | | |
|---------------------------------------|---|
| TIPLÉN : | LANGTSÜNGLEN : |
| 2. Pongsen, 5. Lepko, 7. Omen, | 1. Alimang, 2. Pongen, 3. Samaru, |
| 8. Maongka, 10. Yangkhu, 12. Senpong, | 4. Nün, 6. Pio, 9. Nüngdak, 10. Yongya, |
| 14. Angu, 15. Raksa, 16. Arameso, | 11. Kongro, 13. Ora, 14. Ata. |



KIYONGER DANGBO OLA KHEN AGI TATOKMA NU

Kinungtsü : Hai kü temeim kinungbo, nü dang nüngdak ka ashitsüba sür nung mapang madoker dang ashi, ni ya yakta nungi aginüa liaka ni tanüang bilemteta arur, anungji oda na tanübo office sodi kodang südir nai mamai kü nem tweezer tajung ka alia bener arujangma ta mepeshir.

Kinungbo : Wama ano dang tanur ajak sotempongtemer ana ya aiür asangur kümer jangradema alir nung ano dang tweezer ji kechi nungdak nung amshitsüba yamai nungdaka kü dang ashir aka?

Kinungtsü : Yaa odang ajibo ni nü dang tesülen ashitsüar odang aji nai tamadok. Oda ni ya kangasa timtemer aku, tanü asüng ya kü tenük agi junga mangur aser nai ni timtemba ya kecha memeteter ako.

Kinungbo : Haijatu oda nai kü dang kanga nüngdaka ashiba ama ni office sodi ser arudang nai bilemba ama tajung ka alia bener arutsüogo nu.

Kinungtsü : Wama kangasa pelar adi. Oda asen kibong nung nai teti ak shi dang chiner aser aji Deobarnü Assam bazaar jagi lur akji tezüng memerok aliba shi dang bushia alia bener arua kidang toktsür, anungji koda masü aji tzümelu tatsük nung leter tanungba tezüngji intoktsüba ya kechi tasaang masayanger, aji agi nü dang tweezer ji tajung ka alijang ta ashiba asü adi.

Kinungbo : Auja koda masüba agi dang ashi, shiti sürbo asen tamangerbo Deobarnü amala anogo nung shi ango amala alia awazüa chia jema masübang tajungba ser nung oda koda masü anati tebang mazüoktetba agi raksar dang ako, anungji iba ya asen kidang kiyonger dangbo ola ken agi tatokma nu.

Lilir : S. Repa Pongener. Mon Bosti, Assam

AO OSHI ANGAZÜKDAK:
TANÜ ANGAZÜKTSÜBA OJANG

Kecha
(v) mali, mapa maküm (nothing)
* Ozü kidang police-temi **kecha** mangu.

Kechi
(adj)metetnüa asüngdangba (what)
· Nür azü tenüng **kechi** ?

NAI-A YA METETTER MA?

"Diana Award"
"Diana, Princess of Wales"

Coronavirus lockdown mapang, lokti tenzükba tsütsü shilem tajung agiba atema, 'Indian-British nunger tebur kati 'Diana Award' takok angu. Wellington College (UK) nung azünger arishi küm 15 tain Ishan Kapur-i lokti nung temelenshi tajung adokdaksüba maparen jangjaa aser agizükogo. Ishan ya Delhi nungi lir aser sensaker kibong nungi school azünger tetsür kaketshirtem nem uniform agütsütsü asoshi, pai Sri Ramakrishna Ashram den külemi inyaker. Alima ajunga Covid-19 wara agi maparen ajak anentsür aliba mapang, tesayur aser kaketshir tem tsüngda online class takok ngua agitettsü asoshi, Ishan-i campaign ka tenzüka liasü aser iba campaign ajanga pai euro 5000 (Sen 51,57,499) den laptop 100 jungnüa bendetet. Princess of Wales, asür Diana nüngtem nung, "Diana Award" tenzüksü aser arishi küm 9 nungi 25 tsüngda aier aser asangur tem, shirnoki lokti tsütsü mesüra meimchir asoshi shilem tajung agia temelenshi adokdaksür, item maparen asadanga iba award agütsür.

TANÜBO NAI LANGZÜANG

Q. KK Shailaja ya ___ indang taoba Health Minister lir.
A.Karnataka B.Kerala C.Tamil Nadu D.Andhra Pradesh

=====(Taruba adok nung onoki langzüksü)
YASHI ADOK TELANGZÜBA : Uttar Pradesh

SUDOKU # 5900					TELANGZUBA # 5899												
5			4	8	2	6	5	6	3	1	7	4	9	2	8		
8	7	2	1	3	6		8	1	7	6	2	9	5	4	3		
1	6	4					9	4	2	8	3	5	6	7	1		
9			2			4	6	1	4	2	6	7	9	1	8	3	5
6	4			1		7	2	5	3	7	9	5	4	8	2	1	6
7			6	5	4			3	1	5	8	3	6	2	7	9	4
3			4	6		1	8		7	8	5	2	1	3	4	6	9
2		5							6	9	1	4	5	7	3	8	2
		6		2	3				2	3	4	9	8	6	1	5	7

OJANG LUTEP # 5445

ZÜMENG :

ANDG :

NGNUI :

NGKAA :

GIA :

TAGBJUNA :

TSINYAKÜ :

OSASHI :

MULTEUNG :

JANAGÜG :

OJANG LUTEP TELANGZÜBA # 5444
KÜLEMI MEDEMER KÜMA ALITSÜBA SERNUNG KODANGA
AJURUTEPA MEJIMBITSÜ AMA SAYU

TAN HOPTA ATEMA - KOMA SÜLA ?

Q. Impur Mission Hospital ya ABAM-i lenmang bushitepa Community Health Centre jenjang tashi danga tua lapoktsü lenmang bushitep nung koma süla ?

Olong 20 shi nung July 02, 2021 tashi nung iba telangzüba ya onok dangi (e-mail - tiryimyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzubatemi taruba Honibarnü adoktsütsü.

Tir Kovind-i Ambedkar Memorial atema nüngshilong azüngtsü



New Delhi, Aami/June 29 (Agencies): Tir Ram Nath Kovind-i Mongolbarnü Lucknow nung Bharat Ratna Dr Ambedkar Cultural Centre atema nüngshilong azüngtsüogo. Paisa, nüburttem ajangzüktsü atema mapa tajung apiteta inyakba atema Uttar Pradesh sorkar nem tenüngsang agütsü.

"Baba Saheb (Dr BR Ambedkar) aser Lucknow na tesendaktep kanga tajung liasü. Lucknow nung mapang aika intokba dak alia pai yimtsü sobaliba kanga sapua liasü. Lucknow nung iba memorial amenokba atema ni UP sorkar nem tenüngsang agütsür," ta Kovind-i ashi.

Ambedkar indang jembiba mapang tir Kovind-i, pai tetsürtem nem tashi agütsütsü aser lokti nung ajak nem kasa temeden agütsütsü atema inyak, ta ashi. "Ambedkar ya nükla tajung aliba nisung ka liasü. Pa educationist ka dang masü saka

economist, jurist, politician, journalist, sociologist aser social reformer ka liasü; pai sobaliba, tamangba yimsü aser spirituality dak sendakba nung teyari tulu agütsüogo," ta tiri ashi.

Uttar Pradesh chief minister Yogi Adityanath-i, tir aser kinungtsü Savita Kovind na Lok Bhawan nung agizük. Angh Anandiben Patel, deputy chief ministers Keshav Prasad Maurya aser Dinesh Sharma aser tourism & cultural affairs minister Neelkanth Tiwari aser MLC Swatantra Dev Singh nungera iba sentong nung shilem agia liasü.

Nüngshilong azüngba sentong nung Adityanath-i, "Asenoki Baba Bhim Rao ya constitution yanglusang ama bilemteter. Baba Ambedkar tenüng ya India nung dang masü saka tekubokba jenjang nung alirtem nem ochiobendang agütsüba shia akhümtsüba tetshitsü. Tanü ya kanga tongtimbang anogo ka lir,

kechiyong 1928 küm June 29 nü Baba Saheb-i hopta shia adokba osangkeket Samta tenzuka liasü. Pai India nung lokti ajungkettsü atema inyakogo. Iba art museum & cultural centre tenzükba ajanga pa mapa tajungtem teti bilemtettsü aser Baba Saheb tangatetba aser tamendakdak maneni tejakleni bener aotsü," ta ashi.

Taoba hopta UP cabinet-i Aishbagh nung cultural centre ka amenoktsü atema agizük. Iba memorial ya Aishbagh Eidgah jakdang ali sq meter 5493.52 nung yanglutsü aser süklep 25 talang Dr Ambedkar indang kerakyanglu ka amenoktsü. Iba centre ya sen crore 45 shi indoka yanglutsü, kong nisung 750 asem auditorium ka, library ka, research centre ka, picture gallery ka, museum ka aser multi-purpose convention centre ka alitsü. Iba dak alia centre nung cafeteria ka, dormitory aser tanga facility tem amenoktsü.

India nung nisung crore 32 nem vaccine agütsüogo

New Delhi, Aami/June 29 (Agencies): India nung Covid-19 vaccine agir US dang nungi timba kümogo, ta sangdongba sülen anogo ka lir Union health ministry ketdangsurtemi Mongolbarnü, US dang nungi India nung iba alizüng takaratiba tongtetogo, ta ashi.

"Alima nung vaccine agütsüba linüktem rongnung India tejakdang lir. India-i US ajatetogo aser anogo 163 nung vaccine crore 32 agütsüogo. US-i anogo 193 agi liasü," ta Union health ministry ketdangsurtemi ashi.

Health ministry joint secretary Lav Agarwal-i, "nisung crore 27.27 nem

vaccine mezüngbuba dose agütsüogo aser nisung crore 5.84 nem vaccine tanabuba dose dena agütsüogo," ta ashi.

May 1 nungi June 24 nü tashi nung Covid-19 vaccine dose shilem 56 yimdam yimtsüngtem nung aser shilem 44 yimti aser jila balala nung agütsü liasü, ta ketdangsurteri ashi.

India nung tashidak menar tajemba kuma aoba indang jangjashia joint secretary-i, India nung recovery rate 96.9% jungogo, ta ashi.

"India nung tashidak maneni tajemba kuma odar, kong district balala nung tashidak menar tajemba kuma aoba densema

lir," ta Agarwal-i ashi.

Health ministry ketdangsurtemisa, India's drug controller DCGI-i Moderna Covid-19 vaccine amshitsü atema temelaba agütsüba metetdaksü. "Moderna vaccine amshitsü atema temelaba agütsüogo, koba bendanglen yangluba mozü mezüngbuba lir. Mozü tasenba ya azüoka amshitsü atema lir. Tang Covaxin, Covishield, SputnikV aser Moderna amshitsü temelaba agütsü lir," ta health secretary VK Paul-i ashi.

India-i yakta Pfizer dena tenangzüktepba yanglutsü, ta paul-isa ashi.



Howrah kübok Vatora asetkong nung health worker kati nisung ka nem Covishield vaccine agütsütsü atema renemba mapang tangokba noksa nung angur.

'One Nation, One Ration' Scheme benoktsü SC-i tetuyuba agütsü

New Delhi, Aami/June 29 (Agencies): Supreme Court-i Mongolbarnü, tanga state nungi aahyangertem atema "One Nation, One Ration" scheme, July 31 nü tashi nungbo benoktsü atema state tem nem tetuyuba agütsüogo. SC-isa, wara süshia mao tashi tanga state nungi arurtem mesütsü atema state-i community kitchen anepalutsüla ta shiogo.

Justices Ashok Bhushan aser MR Shah nati, tangalen nungi aruba aahyangertem nem dry ration agütsütsü atema state temi scheme benoktsü tetuyuba agütsü. SC-isa, unorganised aser migrant worker tem züngoksemsü atema National Informatics Centre den tongtepratepa July 31, 2021 nü tashi nungbo web portal ka amenoktsü asoshi Centre nem tetuyuba agütsüogo.

Covid-19 wara pokteter aliba mapang aahyangertem atema tebilemetsü kaa iba tetuyuba agütsüogo.

Activists Harsh Mander, Anjali Bhardwaj aser Jagdeep Chhokar nungeri, tanga state nungi arurtem aser taolen maka aliba aahyangertem nem ration aser chiyongtsü shidak agütsütsü aser parnok pei kidangi jenjang dalang agi meyipa otettsü atema tetuyuba ka agütsüdaktsütsü asoshi Supreme Court dang mepeshia zülua liasü.

Temepeshiba nung, state tem nung takümbo kanga kümdanga asadanger curfew aser tenokdangbatem agütsüdar, saka aahyangertem aser tanga state nungi arurtem atema teyari peria magütsür aser parnok maneni timtem nung lir, ta shia lir.

(Maneni tapak 10 nung...)



Mumbai nung mapa nungi anentsür aliba assistant police inspector Sachin Vaze densema aliba rakzurakdem ken o dak sendakba nung senotsü ochi meshi amshir aliba ken o nung ED-i Deshmukh tanaben jaokba sülen taoba home minister Anil Deshmukh indang legal representative avocate Inderpal Singh Enforcement Directorate office-i aruba mapang tangokba noksa nung angur.

Bihar nung ozüng alema prangbong yangludak 7 potet

New Delhi, Aami/June 29 (Agencies): Bihar Police-i Munger district kübok Taufir Diara tesem nung ozüng alema prangbong yangludak tenet potetogo. Police-isa, prangbong yanglur pezü puogo.

Munger SP tetuyuba nung Mufasil police station nungi ketdangsurtemi Taufir Diara tesem meita ao. Police-isa, prangbong teyangluta ana, pistol ka aser prangbong yangludang amshiba hadirtem ngutetogo.

Bihar kübok Munger district ya ozüng alema prangbong hadirtem shibelenba atema kanga nüngtugu lir.

Police-i pua aliba prangbong yanglur pezü ya Bhumi Yadav, Rohit Yadav, Nero Yadav aser Kewal Yadav ta jangjaogo. Parnok pezüprongla ya Munger district, Mufasil police station kübok Maya Dariyapur nung alirtem lir.

Police sangdong ka ajanga ashiba agi, parnok ya ozüng alema prangbong shibelenba nung densema lir. Parnoki Ganga ayong nung tzü

metsünga atuba maongka agia inyaksangshia liasü, kechiyong police tem iba tesemi moteti liasü. Ajisüaka police-i iba tesem meita ao aser parnok puogo.

Munger SP Jagunath Jala Reddy-i, Munger district kübok police station tem temeket nung aliba tesemtem ajak nung police temi prangbong shibelenertem pudar, ta ashi. Police team temi ozüng alema prangbong shibelenertem mapangshia meita odar. "Munger nung amenoker aliba pranbong yanglur aser shibenerntem maneni aputsü merangtsü," ta pai ashi.

Iba ita tetenzüklen Bihar Police-i, Munger district nung tetsür ka densema prangbong shibelenertem ana apu. State Task Force (STF) aser district police senteper meita aoba mapang parnoki 7.65 mm pistol 13, magazine 13 aser injang 100 den mobile phone ana pua liasü.

Iba inyakyim ya tetsür ka tenüng agi Sadhan Devi tenüng nung inyaksangshia liasü, shiba Bhagalpur district kübok Sahu Parbatta tesem nungi lir.

Indonesia nung arishi kum 12 temapur nem Covid-19 vaccine agütsütsü

Jakarta, Aami/June 29 Southeast Asia linüktem nung tang wara tanabuba wave agi kanga mejungi kongshir lir, ta ashi. Hombarnü linük nung nisung timba dak coronavirus tashidak potetba health ketdangsürtemi sangdongba sülen iba osang metetdakja liasü.

Linük nung Food and Drug Monitoring Agency-i tanurtem nem Sinovac vaccine agütsütsü atema temelaba agütsüba sülen iba osang sangdonga liasü.

Widodo-i video osang ka ajanga, tanurtem nem vaccine agütsütettsü atema agency-i temelaba agütsüba atema kanga pelaba lemsatepa liasü.

Paisa, linük nung tang anogoshia nisung million ka nem vaccine agüja aliba ya August ita tashi nungbo anogo nung million anana agütsütsü atema ketdangsür nem tetuyuba agütsüogo, kechiyong

South East Asia linüktem nung tang wara tanabuba wave agi kanga mejungi kongshir lir, ta ashi.

Hombarnü linük nung nisung timba dak coronavirus tashidak potetba health ketdangsürtemi sangdongba sülen iba osang metetdakja liasü.

Tang tashi nung Indonesia nung nisung million 2.1 dak coronavirus tashidak potetogo, koba Southeast Asia kübok linüktem rongnung timba asütsü aser kasa mapang nung tashidak agi nisung 57,100 dak tema süogo.

Indonesia nung nütsünyongsök million 270 nungi ketdangsürtemi tang tashi nung nisung million 13.1 nem vaccine tembanga agütsüogo aser nisung million 14.2 nem vaccine mezüngbuba shilem agütsüogo.

Jacob Zuma ita 15 tepuokdak ayutsü obendang agütsü

Cape Town, Aami/June 29 South Africa nung okadak temabai Mongolbarnü taoba tir Jacob Zuma ita 15 tepuokdak ayutsü obendang agütsüogo.

Pai bushitsüngdang matsüngdang nokdaksü memulungi okadak mezüngmeshiba atema iba obendang agütsü.

"Constitutional Court-i kecha minyaktettsü saka okadak mezüngmeshiba atema Zuma aitsüogo," ta obendanger Sisi Khampepe-i ashi.

Arishi kum 79 tain Zuma-i tir mapa abenba mapang state rongsenketsüng mashiyimi amshiba atema aija lir.

"Iba amala inyakyim ya ozüng alema lir aser merenshütsü," ta Khampepe-i ashi.

"Zuma tepuokdaki yoktsüba dak alaker tanga lenmang kecha mali aser iba ajanga temzüng ozüng aser ochi obendang ajak dang temaba ta osang tejangja ka agütsütsü imlar,"

"Obendang agütsüba nung ita (Maneni tapak 10 nung...)

15 tepuokdak ayutsü latettsüogo," ta lai sangdongba den Zuma dang anogo pongu tsüngda bendanga agütsütsü tetuyuba agütsüogo.

Ken o ya Deputy Chief Justice Raymond Zondo lenisüba nung bushitsüngdangdar.

2018 kum African National Congress (ANC)-i Zuma matsüngtok tsüngda ochi mashi ken o aika akümba ajanga pa nongshiba sülen iba panel ya pai tentettsüba lir.

Ajisüaka pai 2019 kum July ita dang kuli agüja lir aser iba sülen anogo ishika lir commission tekolakba Zondo-i tejak repranga inyaksangshir ta shia kuli magütsüi aküm.

Pa dang bushitsüngdang matsüngdang nokdanktsü asoshi aiben tetuyuba agütsüogo, saka medical dak sendakba tatemtsü aser tanga ken o ka atema renemshir ta shia pai item tetuyuba sülen manidak.



Chinese Communist Party tenteter kum 100 ajungba benjongmung amungtsü lia Beijing nung China mitkartemi tzüym sepai indang tayimtsü abenba rong ka indang noksa anasa jiloshi kar aiba noksa nung angur. China nung tang yimsü tesüdak Communist Party kum noklang ka ajungba benjongmung nung parnok tashi ulua akumba indang alima dang metetdakja amungtsü.

US-i India nem sen million \$41 jenjang COVID-19 teyari agütsütsü

Washington, Aami/June 29 (Agencies): India-i COVID-19 tashidak wara den raraba aser tarutsü nung health emergency tem atema renema alitsü asoshi US ajanga sem million \$41 jenjang teyari talila agütsütsü sangdongogo, anungji teyari ajak agi sen million \$200 dak tema akumer.

April aser May ita India nung COVID-19 tashidak wara wave tanabuba agi timtema anogoshi nisung 3,00,000 dak tema iba virus yagi menepa liasü. Mozüki nung medical oxygen aser yipten agi anünga liasü.

United States nung iba ama teyari nungdaka aliba mapang India-i yari, aser tang India nung COVID-19 tashidak den maneni raraba mapang India nung den United States lir, ta US Agency for International Development ajanga Hombarnü ashi.

COVID-19 tashidak wara den raraba aser tarutsü nung health emergency tem atema renema alitsü asoshi India nem sen million \$41 jenjang teyari tali agütsüsemtsü USAID ajanga sangdong.

USAID indang teyari yagi COVID-19 tendangba, tashidak wara dak sendakba mental

health services, mapang shidak nung medical service agütsüba aser tesem tezülen healthcare nung teyari angutsü, ta US federal sorkar indang temeja tentet yagi ashi, shirnoki bendanger civilian nem teyari balala agütsür.

Iba teyari talila agütsüba ya ajanga USAID-i maneni India den lungjemer healthcare supply chains aser electronic health information system tashi itshitsü, mozü agütsüba maparen nung nungittsü aser private sector teyari nunga yarisemtsü, ta parnoki ashi.

Tashidak wara tenzüka sülen India indang COVID-19 teyari aser maparen balala atema USAID ajanga sen million USD 200 dak tema teyari agütsüogo, aser item rongnung sen million \$50 dak tema alang tashidak menatepa aoba nokdangtsü aser azioktsü atema frontline health worker 214,000 dak tema nem emergency supply aser training agüja India nung million 42 dak tema ajanzük, ta osang ka

ajanga ashi.

India aser Nepal densema South Asia nung kanga sashia kongshir aliba linüktem nem US ajanga American Rescue Plan Act of 2021 kübok sen million \$300 dak tema indang teyari agütsür, koba Tir Joe Biden-i March 11 nü meyongnem agüja liasü. May ita India nem sen million USD 100 jenjang COVID-19 teyari agütsütsü, ta Tir Biden-i sangdonga liasü.

US-India Chambers of Commerce Foundation ajanga India nung coronavirus dak sendakba teyari atema sen million USD 1.2 dak tema bendena liasü. Iba sen bendenba nungi US-India Chambers of Commerce Foundation ajanga ventilator 120 jungnüa aser oxygen concentrator 1,000 dak tema India nem agütsüogo, ta June 3, 2021 sangdong ka nung ashi.

Biden-i par administration ajanga linük balala nem COVID-19 mozü doses million 25 agütsütsü ta sangdonga lir, aser yangjia India kanga ajanzüktsü.

Occupied East Jerusalem nung Israel sepaitemi ki bentsü

Al-Bustan, Aami/June 29 (Agencies): Israel sepaitemi occupied East Jerusalem nung aliba al-Bustan kübok Silwan nung Palestine nung business ka Mongolbarnü bentsüba ajanga rongrong adoka liasü.

Israel sepaitem den bulldozer tem Palestine nung aliba tesem yagi arua Silwan nung shilepba dokan ka bentsü. Sepaitemi ki bentsüba mapang parnoki yangji alir aser Palestine nung activist dak tear gas aser süng amshia liasü.

Iba mangatetep nung Palestine nung pezü yirua liasü, ta Palestine Red Crescent ajanga ashi. Mosque indang loudspeaker tem nungi yangji alirtem dang adenshia pei ki kumzüka ayutsü yimyim ayimba mapang Israel sepaitemi ain adoka aliba Palestine nung aridoktsü atema

rubber agi meyibanga aliba injang khalokja liasü.

June 7 nü Jerusalem municipality ajanga Silwan kübok al-Bustan nung alir ki kar bentsütsü totuyuba agüja liasü.

Nisung 130 shi aliba kibong 13 dang ki azüngteta par sasa abentsü atema anogo 21 agütsü aser iba totuyuba nung manidaker indang ki ya municipality ajanga bentsütsü aser ki bentsüba sen \$20,000 ki kiburi menoktsü, ta shia liasü.

Israel nungeri iba li ya national park ka kumdaktsütsü aser archaeological City of David area den sendakteptsü nükjidong nung 2005 kum nungi tang tashinung al-Bustan nung ki 90 jungnüa abentsü totuyuba agüja lir aser parnoki temelaba makai ki yanglu, ta aitsür.

(Maneni tapak 10 nung...)



Zipaquira, Colombia nung aliba Regional Hospital nung nisung tasü mang ayudak tesem ka nung health worker kati nisung ka COVID-19 agi asüba indang record bendenba noksa nung angur. Colombia ya COVID-19 tashidak wara jatetba tesem ka kumer lir, kong iba tashidak wave tasembuba tenzüko.

Salomi aser Amikioro nung vaccination drive agiogo



Kiphire, Aami/June 29, 2021: Pungro HQ, Kiphire kübok Salomi HWC-Sub Centre nung vaccination drive agiba mapang tangokba noksa ka yangi angur.

Kiphire, Aami/June 29, 2021 (TYO): Mongolbarnü, Pungro HQ, Kiphire kübok Salomi HWC-Sub Centre nung vaccination drive agia liasü. Arishi küm 18 nungi 44 tsüingda nisung 44 aser arishi

küm 45 nungi temapur nisung 17 tashi nem vaccine agütsüogo.

Kasa anogo, Amikioro yimtsüing nunga vaccination drive agi. Pungro ADC kübok Dr Kesusato-i anir PHC

Likhimro ajanga iba drive ayongzüka liasü. Iba anogo temsüa alir nisung 17 nem vaccine agütsüogo aser iba yimtsüing nung vaccine agir nisung 34 tashi kümogo, ta sangdong ajanga metetdaksü.

Kiphire & Pfutsero nung special vaccination drive agitsü

Kiphire, Aami/June 29, 2021 (TYO): Krishi Vigyan Kendra, Kiphire den District Horticulture Office, Kiphire longjemer July 2 aser 3, 2021 nü Kiphire district kübok yimtsüing tenet nung Covid-19 sensitisation program den special vaccination drive ka ayonga agitsü. Iba sentong nung shisalen sayur ama Sr. Scientist, KVK, Kiphire, Dr.N. Khumdemo Ezung aruagi adentsü.

Iba special vaccination drive sentong ya Latsu, Sangkhumti, Kiusisu, Metonger, Kissam

town, Kiusam village aser Chikiuponger village tem nung agitsü terenemba lir, ta sangdong ajanga metetdaksü.

Pfutsero : Additional Deputy Commissioner Pfutsero-i sangdong ka ajanga, Pfutsero Town nung alirtem atema July 04, 2021 nü (Deobar) Pfutsero Town Sports

Complex nung anepdang 09: 00 ako nungi nikongdang 04:00 ako tashi Block Task Force on COVID-19, Pfutsero-i 'special vaccination drive' ayongzüksü, ta metetdaksü.

Anüingji, tejangrar ajaki iba maangka tajung agitsü asoshi mepishir, ta kasa sangdong nung shia lir.

Pungro Town nung vaccination drive tenzüksüogo

Kiphire, Aami/June 29, 2021 (TYO): Nübur nem vaccine agütsüsü nükjidong nung, ADC, Pungro, Abhinav Shivam IAS-i anir Medical team kati Mongolbarnü Pungro Town nung (29.06.2021) 'special vaccination drive' mapatong ka tenzüksüogo.

Iba Town kübok ward ana nung vaccination drive atongsema agiogo. Dr. Kisheka-i anir medical team

kati Old Bazaar ward nung iba drive achayanga liasü, kong temsüa alir nisung 36 tashi nem vaccine agütsü. Kasa mapang, ward tanabuba nung Dr. Bipenthung Jami-i anir medical team ajanga temsüa alir nisung 90 nem vaccine agütsüogo. Iba vaccination drive mapang temsüa alir nisung 126 tashi ajangzüko, ta sangdong ka ajanga metetdaksü.

AR-i Old Vongti nung süngdongtem atem



Dimapur, Aami/June 29, 2021 (TYO): Mongolbarnü, HQ IGAR (North) kübok Kiphire Battalion - Assam Rifles-i Pungro Town aser Old Vongti Village, Kiphire district nung COVID awareness drive den süngdong atemba sentong achayanga agiogo.

'CLEAN AND GREEN NAGALAND' omen nung ajemdaker Asaam Rifles-i Pungro Town aser Old Vongti Village nung süngdong atemba sentong ayongzüka liasü. Iba mapatong shilem ama, Assam Rifles den lisopurtemi yaritepa süngdong balala temoktsüogo.

Kasa anogo, nübur dang vaccine agitsü ajungmesotsü nükjidong nung, Assam Rifles-i COVID awareness drive ayongzüka liasü. Iba mapang, AR team-i COVID dak sendakba oset talisa tejak nembangba mask aser sanitizer tem lema agütsü.

Assam Rifles-i achayanga agiba sentong tem lisopurtemi pelashishia agizükogo, ta sangdong ajanga metetdaksü.



A SIMEON AO (Mangmetong)
Tasoba kum: 89 tain | Asu: 06-06-2021

Kechiaser ni asoshi takum alibaji Kbrista. aser tasunuji tajangzuk lir. Filipi 1:21

Onoki temeimba obala alima nungi pilar mangyim jashi aser temulung raksaa rongjenseta alidang, nenok sarasadem den, shisatsu, rongsen aser nebu agi nungeta kija, kibong, kiyonger, kidang-kimang, medemertem, councils, arogotem aser lokti balalai ozu yariba asoshi ozu kinungertemi nenok ajak dang kanga pelaba metetdaksur. Ozui nenok kija shia dangi tsungdong arur kanga pelar ta meshitetba asoshi kanga sasaa bilemer. Tulusang Tsungremi nenok tali moajangma ta ozu tamang sarasadem sudi.

Oba ! na ozu tekumzucker, akhum aser anisungzuk agutsusang aser onok takum jenjang yanglutsusang. Nai mapa tajung inyaka toktsuba onoki kodanga mamatetsu.

Na iba timtem touthi lima toktsur oadokkoko aser na tang tepela tesunep lima nung Yisu Khrista teka nung anisungzuka lir.

Temeim Chirnurtem, Semchirtem, Anukabangtem aser Kinungertem.

MULUNGNEN O

Onoki teti meima aliba, asür **Supongsangba** (Dibuia), pa mapang talangka shiranga alidang aser iba akümüli nungi pila orr onok mangyim jashi nung alidang, kiyonger, medemer aser temulung kwinakati nungita yaria aser lenmang balala ajanga ozü mulung süneptsüogo, nenok ajak dang kinungertemi pelaba lemsateper.

Onoki item tentettem dang alakteta pelaba shisemer:

1. KABA
2. DABA
3. Notun Bosti Ao Khel Council
4. Women Department Dibuia Baptist Church
5. Kohima Dibuia Senso Telongjem
6. Kohima Dibuia Fellowship
7. Dimapur Dibuia Senso Telongjem
8. Dimapur Dibuia Fellowship

Tagizüker dang nungibo tagütsür kanga agi temoatsüba asünung, Tsüngremi nenok ajak molamushia moajangma.

Temeim Adianutem, Kinungertem aser Anük-Apangtem.



ASO : 06.05.1953
ASÜ : 15.06.2021

In the Court of
Principal District & Sessions Judge
Mokokchung : Nagaland

S/C NO. 98/2021

NOTICE

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/pension benefits of **Late I.Katila Pongener** has been applied by **Shri. P. Imsu Jamir** H/o Lt. I.Katila Pongener R/O H.No 67 Sangtemla Ward, Mkg Nagaland for possession of: GPF, GIS, Gratuity, Leave encashment, Pension etc, Closing of A/c.

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of **24.7.2021** Given under the hand and seal of the court on this the **24.6.2021**.

Sd/-

Principal District & Sessions Judge
Mokokchung : Nagaland

In the Court of
Principal District & Sessions Judge
Mokokchung : Nagaland

S/C NO. 99/2021

NOTICE

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/pension benefits of **Late Limatoshi** has been applied by **Smti I.Amenla Jamir** W/O Lt. Limatoshi R/O H.No 79 Artang Ward, Mkg Nagaland for possession of : Closing of A/c.

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of **24.7.2021** Given under the hand and seal of the court on this the **24.6.2021**.

Sd/-

Principal District & Sessions Judge
Mokokchung : Nagaland

In the Court of
Principal District & Sessions Judge
Mokokchung : Nagaland

S/C NO. 106/2021

NOTICE

NOTICE INVITING CLAIMS/OBJECTIONS OF OTHER CLAIMANT(S) FOR ISSUE OF SUCCESSION CERTIFICATE UNDER PART-1 OF INDIAN SUCCESSION ACT 1925

Whereas application under Succession Act 1925 for grant of Succession Certificate for the estate/pension benefits of **Late Rekha Ram Sharma** has been applied by **Shri. Suresh Kumar Sharma** S/O Lt. Rekha Ram Sharma R/O H.No 72 Alongmen Ward, Mkg Nagaland for possession of: Closing of A/c.

Notice is hereby given that any person having interest in the administration of the estate/pension benefits of the said deceased may if she/he so desire appear in this court on or before the said day of **25.7.2021** Given under the hand and seal of the court on this the **25.6.2021**.

Sd/-

Principal District & Sessions Judge
Mokokchung : Nagaland

In the Court of
Principal District & Sessions Judge
Mokokchung : Nagaland
Guardianship Petition No. 3/2021

NOTICE

(Section 10 of Guardianship and wards Act)

Whereas an application under the Guardianship and wards Act has been filed by Shri. Talinangshi for appointment of Guardian in respect of Minor(s)/disabled Mr. Takonungang before the court and whereas the day of **24.7.2021** has been fixed for the hearing on the matter.

Notice is hereby given inviting objection if any from the person having interest in the above minor(s)/disabled to be furnished on or before the fixed date/or appear in person.

Given under my hand and seal of the court on this 24 the day of June 2021.

Sd/-

Principal District & Sessions Judge
Mokokchung : Nagaland

Copa America: Argentina-i goal 4-1 agi Bolivia kokogo



Copa America asayamung nung Argentina nungi asayar Lionel Messi-i goal tanabuba yokba sülen pelatepba noksa nung angur.

Cuiaba, Aami/June 29, 2021

(Agencies): Copa America asayamung Group A nung, Argentina aser Bolivia na Hombarnu asaya liasü. Iba asaya nung Lionel Messi-i goal ana tashi idakja, Argentina-i goal 4-1 agi Bolivia akok. Messi-i goal ana idaktsüba dak alia, pai linük tenüng nungi international asaya 148buba nung shilem agia record yangluogo.

Messi, shibai taoba hopta Argentina nung asayar tejen, Javier Mascherano indang international record 147 menepa liasü, Cuiaba indang Arena Pantanal stadium nung Bolivia den asayaba mapang, pai iba alizüing tasen (international asaya 148) tongtet. Pai goal ana meinoktsüdang, pa teyari ajanga Gomez-i Argentina atema mezüing goal idaktsü.

Iba takok ajanga, Argentina-i Honibarnü Ecuador den

quarter-final asayatsü lenmang yangluogo. Group B nung, Ecuador pur jenjang pezübuba tongteta lir.

Bolivia team, shirnok tan Copa America nung mezüing asaya asem tashi tamakok ngur sülen iba asayamung nungi tsükadoker lir, iba asaya nung, team tesashi - Argentina puri parnok amokbangadok aser iba team kokteta asayatsü asoshi parnoki kecha meinyaktet.

Team ana tsüingda asaya tenzükli, minute 3buba nung Argentine-i goal idaktsütsü maongka angu, saka Sergio Aguero aser Angel Correa nati metsüba goal ana tashi Bolivia goalkeeper Carlos Lampe-i kanga dang tasüita nokdangtet.

Ajisüaka, mapang talangka magii Argentina-i ano maongka angu, kong Lionel Messi-i metsüba ball Papu Gomez-i agizüka mezüing goal idaktsü

aser minute trok sülen Argentina pur goal 1-0 agi Bolivia tejakdang ser asaya.

Bolivia nungi Diego Bejarano-i asaya yimya den mapet benshia Gomez alangdaktsüba mapang, Argentina-i goal tanabuba atema penalty metsütsü maongka angu, koba minute 33buba nung Messi-i aibelen mesüi iba penalty metsülökja goal idaktsü.

Messi-i iba goal idaktsür sülen, Argentina asayartemi pei pei tata shilem junga azüoka asaya.

Tatsüka dang lir, Bolivia-ia mezüing goal idaktsütsü maongka angu aser meta ka nungi Jeyson Chura-i ball dak metsülöktsü, saka ball ji goal adena mayidang, tom nung Argentina goalkeeper Franco Armani-i kanga dang junga ball ji ajepzük.

Euro 2020: Switzerland quarter final-i iogo

Bucharest, Aami/June 29, 2021 (Agencies): Hombarnü, Euro 2020 asayamung - round of 16' nung Switzerland aser France na tsüingda latetja aliba mapang tashi asayaa mapang talila apuloktsür asayaba sülen, team anapronglai goal 3-3 idakja draw nung tembang.

Iba sülen team ana penalty metsütepa liasü, kong France striker Kylian Mbappe-i penalty metsüpetba sülen, Yann Sommer-i par telok atema penalty pungobuba idaktsü aser Switzerland-i goal 5-4 agi France tsükdakja Euro 2020 quarter-final tongogo.

Switzerland-i Spain den quarter final asayatsü. 1938 küm nungi tongtibang asayamung nung shilem agia arur iba asayamung nung Switzerland puri knockout round nung mezüing takok angur alitsü. Ano külen, parnoki 1954 World Cup ayongzüküer külen nungi tan asayamung last eight tongtetba ya mezüing alitsü.

Kodanga mamatettsüsa,

'Nati' ta nüngja agütsüba Swiss football team-i iba round nung bendanga agütsür asayaogo. Switzerland pur goal 3-1 agi France tesülen liasü, saka asaya atemtsü minute pungo anünga lia, parnoki goal ana tashi atonga idaktsüba sülen, mapang talila asaya aser penalty metsütepa iba asaya tembang.

Iba asaya tanabuba half nung, minute ana tsüingda Karim Benzema-i goal ana tashi atonga idaktsüba mapang, France-i iba round koktettsü ama asadangtet.

Mezüing half - minute 15buba nung, Haris Seferovic kolak agi goal ka idaktsü aser Switzerland pur goal 1-0 agi France tejakdang ser aliba mapang, half time tongadok. France-ia telangzüba tajung agüja, Mbappe-i metsüketa yokba ball ka Benzema-i agizüka, minute 57buba nung mezüing goal idakja telok anaprongla goal 1-1 kumadok.

Minute ana lir Benzema-isa goal tanabuba idakja France 2-1 agi Swiss team tejakdang akümba

mapang, pai iba asayamung nung goal pezübuba idaktsü. Mezüing half nung France-i goal danga meinoktsüetba sülen, minute 55 nung Switzerland team-i penalty ka metsüpet.

Ricardo Rodriguez-i iba penalty metsülöktsü, saka France goal keeper Hugo Lloris-i iba goal nokdang.

France atema Paul Pogba-i minute 75buba nung goal ka idakja, par telok goal 3-1 agi Swiss tejakdang akümba mapang, Switzerland team pur teimla mekai kumadok.

Ajisüaka, asaya atemtsü minute ishika dang anünga lia, Seferovic kolak agi tongokja goal tanabuba idaktsü aser minute 90buba nung, substitute Mario Gavranovic-i goal keeper Lloris adena goal tasembuba metsülöktsü. Iba sülen, France substitute Kingsley Coman-i goal pezübuba idaktsütsü merang, saka goal post nung ondaker tukadokba ajanga telok ana tsüingda penalty metsüteptsüsa aküm.

Argentina-i maneni iba asaya amokbanga shilem agi aser mezüing half atemtsü lia, Barcelona team nung külem asayar Aguero-i metsüba ball ka Messi-i agizük aser minute 42buba nung pai goal tanabuba idakja, Argentina pur goal 3-0 agi tejakdang ser mezüing half tembang.

Break sülen, Bolivia-i goal ka idaktsütsü maongka angu aser Leonel Justiniano-i metsüketa yokba cross ball ka Erwin Saavedra-i agizüka minute 60buba nung Bolivia atema goal idaktsü.

Ano, Argentina-ia telangzüba agüja, team nungi substitute asayar, Lautaro Martinez-i minute 65buba nung telok atema goal pezübuba idaktsü.

Kasa asayamung - Group A

asaya tanga ka Rio de Janeiro nung asaya liasü. Iba group nung, Uruguay-i goal 1-0 agi Paraguay tsükdaktsüba sülen, group table nung parnoki tanabuba jenjang tongtetogo.

Iba asaya nung, Edinson Cavani indang goal ajanga Uruguay puri takok angu. Cavani-i minute 21buba nung goal idakja liasü. Honibarnü, Uruguay-i Colombia den quarter-final asayatsü.

Paraguay puri tamakok anguba den group nung parnok jenjang tasembuba nung tembang aser Hokolbarnü par telok Peru den asayatsü. Ano külen, Chile team, shirnok Group A nung jenjang pezübuba tongteta lir, Hokolbarnü asayamung ayonger telok - Brazil den parnok asayatsü terenemba lir.

'One Nation, One Ration'... (Tapak 7 nungi...)

"Iba ajanga aahyangertem tanaben pei ki bushi aotsüsa kümogo, shirnok kidangi meyipa aotsü atema urban centre tem nung train aser bus terminal tem mesemi nongteper," ta parnoki ashi.

2020 küm benokba application ajanga Centre sorkar dang Atma Nirbhar Bharat scheme kübok taoba küm jangjar aliba National Food Security Act (NFSA) mesera State PDS cards küboki maiter bangdang aahyanger crore 8

nem ano dry ration agütsüdaktsütsü atema tetuyuba agütsütsü mepeshia asüingdangogo.

Bendanger aahyangertem züngoksemtü atema software kanga menoa meyanglüzükba SC-i süoki ia agiogo. SC-isa, centre dang ration card malir bendanger aahyangertem nem 'Pradhan Mantri Garib Kalyan Yojna' kübok taküm küm November ita tashi angati chiyongtsü koma agütsütsü ta asüingdangogo.

Occupied East Jerusalem... (Tapak 8 nungi...)

Palestine nung aridoktsü mechi ki bentsüba aser court totuyuba ya amshir, ta Palestine nung indang NGO, Grassroots Jerusalem ajanga ashi.

East Jerusalem nung nütsüing yongzük timba Palestine nung lir, saka Israel nung ozüing balala ajanga yangji aliba ali shilem 35 shi Israel nung alitsü atema lemzüktsüogo, ta Palestine nung temeden asoshi nokdakba telok, Al-Haq ajanga ita tetenzüklen sangdong ka nung shia liasü.

Ano ali ya shilem 52 shi

'green areas' aser 'unplanned areas' ta lateta lir, kong ki-o-jen yangluba nokdang, ta parnoki ashir.

Silwan ya Jerusalem indang Old City south tsütsü jara nung neploka lir aser yangji Palestine nung nisung 33,000 shi alir, kong Israel settler organization temi küm aika tenük yoka arur. Ki kar nungbo Palestine nung aser Israel settler tem külemi lidaktsür.

Palestine nung ya kibong karbo 1960s mapang Old City nungi prokshiba sülen Silwan nungya küm 50 dak tem alia arur.

Jacob Zuma ita 15 tepuokdak... (Tapak 8 nungi...)

Pa November ita jaokba ama aru saka ken o mashishi tsüingda ayazüka oadok aser iba sülen Zondo-i Constitutional Court dang jenjang tapet agitsü asüingdang.

Commission-i ken o bushitsüingdangba nung India nung shishilembar Guptas kibong nungi adianu asem densema lir, shirnok nem sorkar contract tulu aika agütsü aser parnoki cabinet minister tem den shimteter ta ashir.

Zuma ochi mashi ken o 16 nung aija lir, kong 1999 küm fighter jets, patrol boats aser European arms firms pongu nungi rand billion 30 agi military hadirtem alizükba densema lir.

Hadirtem alizükba mapang Zuma ya tir Thabo Mbeki indang deputy liasü.

Kasa mapang nung French defence giant Thales nungi rand million pezü sübokrem agiba atema pa aija lir.

BILEMDANGANG

"Karaa angazüktsü merangang, saka mit adoktsü milongi süang."